



Theodoricus filius fuit Clodouei primi Christiani apud Francos regis ex Crothilde Burgunda. Is mortuo parente partitus cum fratribus tribus paternas ditiones, ipse Oriëntalem tractum Germaniæ, à Mosa ad Rhenum excurrentem, accepit. Clodomyrus enim Burgūdiā & Aurelianensem agrum, Childebertus Aquitaniam & interiorem Galliam, Lotharius autem in ea diuisione Parisios sortitus erat. Itaq; Theodoricus inter fratres natus minimus, regia posita in Mediomatricibus inter Mosam & Mosellam, ab illa se Metensium regē, à situ uerò sortitæ regionis se primum regem in Ostenreich nominauit. hunc postea La-

tini Chronographi nomine corrupto Austriæ & Austrasiæ regē dixerunt. Erat aut̄ is manu strenuus, atq; magna prudētia p̄ditus. Vnde cū exercitu Rhenum transgressus, cōtra Irmenfridū Thuringiæ regem ob fines regni bellum suscipit. Prælio autem ad Onestrudum Saxoniae fluuium cōmisso, adeò occisorum corporibus omnia repleta fuerunt, ut Frāci illac quasi per pontē transirent. Postea Irmenfridum regem ad se accersitum Tolbiaci è mœnibus præcipit. Ut autem ab Alemannis tutior esset, cum Utilone Handuerpiensi & Oceani Marchione, qui & ipse Turingis resistebat, foedus iniit, & Heribertum eius fratrem in Vangionibus limitis præfectum constituit. Inde ut suos fines aduersus Romanos conseruaret, Gothis in Italia congenitili nationi cum Bellisario & Narzete pugnantibus, fida sua auxilia subministravit.